

天台藏

維摩經玄疏

湛然寺

印行

天台藏之十

維摩經玄疏

湛然寺

印行

維摩經玄疏

印行者 湛然寺

地址：台南市忠義路二段38巷8號
電話：（〇六）二二二八五一八
郵撥：〇〇三五四四五—三（因明雜誌帳戶）

承印：祥光彩色製版社
地址：台南市東豐路53巷31號
電話：（〇六）二二七二五七三
二二七七八三六六

中華民國七十七年五月依普門會性老法師所藏木版原書影印一千部
佛曆三〇一五

中華民國八十三年二月十九日再版五〇〇部

維摩經玄疏卷第一

天台山修禪寺沙門 智顗 撰

此經理致深遠。言旨淵玄。若但依文帖釋。恐止事數而已。一教宗極。終自難量。猶須略忖幽微。顯不思議旨趣。今輒於文前。撰五重玄義。

第一釋名。 第二出體。 第三明宗。

第四辨力用。 第五判教相。

釋此五義。卽爲二。一通釋。二別釋。就通釋五重。略爲六意。一通標五義名。二辨次第。三引證。四明總別。五約觀心。六對四悉檀。

第一通標五義名者。此經以不思議人法爲名。不思議眞性解脫爲體。不思議佛國因果爲宗。不思議權實折伏攝受爲用。不思議帶偏顯圓爲教相。故今明此經始從如是我聞終乎歡喜奉行。皆明不思議也。第二辨次第者。雖理絕名言。非名言無以設教。故於無名之道。假名相說。而名以召法。法以應名。是以經之指歸。蘊在名內。故先標名。夫尋名得理。理卽眞性。解脫眞性解脫卽經之體也。故次出體。體不孤致。求之有方。涉行修因。然後致果。故用佛國因果爲入理綱宗。提綱目動。故次明宗也。行因趣果。得果卽能巧。

用權實。折伏攝受。利益眾生。故次明用也。聖人談教。隨逗機緣。機緣不一。是以教有異同。故次明教相也。第三引證者。囑累品云。此經名維摩詰所說。亦名不可思議解脫法門。此卽人法雙題。共標名也。觀眾生品云。佛爲增上慢人。說離婬怒癡。名爲解脫耳。若無增上慢人。佛說婬怒癡性。卽是解脫。婬怒癡性。卽不思議眞性解脫。爲體也。又佛國品。明寶積獻蓋。請問淨土。佛所演答。具說佛國因果。卽是明宗也。室外彈訶。室內攝受。不思議品云。菩薩住不思議。能種種示現神力自在。如龍象蹴蹋。非驢所堪。故知此人法權。

實折伏攝受。卽經之用也。教相者。通明此經與諸經。教相有同異。故須判教相也。第四明總別者。就前五條。束爲三意。初但標人法。此卽是總。次開體宗用。此卽是別。後明教相義兼總別。所以然者。初題人名名總三義。故名爲總。今欲分別教門。應須分別體宗用之異。故名爲別。人是別總。三義是總別。是則總總於別。別別於總也。所以然者。人名淨無垢稱淨。卽真性。真性清淨。卽是體也。無垢卽實慧。實慧因果。卽是經宗。稱卽方便巧能。卽是經用。引而申之。故謂之別也。教相者。旣通明諸經同異。故

義兼總別。此義虛玄。恐未明了。今借近喻。以暢滯情。
譬如人身。初受胎報。歌羅邏時。卽有三法。一命。二燭。
三者心識。迄乎皓首。猶存三事。總而爲論。共受人名。
分而言之。其有三法。雖復世間之境。亦與妙理相應。
所以然者。三法成身。卽况初總。心識爲主。卽况前明
體。風命相續。卽况前明宗。舉止運爲。卽况前明用。人
道雖同。種性殊別。卽况前明教相同異也。類此五法。
上義可知。問曰。立此五義。止明此經。復通餘部。答曰。
眾家立義。借意不同。今爲五重。總貫諸典。問曰。諸經
教相。互有差別。差別之教。豈盡同五。答曰。譬如五陰。

成人。人雖不同。共稟五陰。又如經首通序五義。五義雖同。在事別也。

第五約觀心釋五義者。一切萬法。本自無名。無名而
有名者。皆從心起。故心卽名也。心爲體者。眾生心性
卽眞法性。故云體也。心爲宗者。此經云。如其心淨。卽
佛土淨。心卽宗義也。心爲用者。正觀權巧。折伏見愛。
故名用也。心爲教者。此經云。弟子眾塵勞隨意之所
轉。卽教相也。問曰。何俟約心釋此五義。答曰。此經問
疾品云。諸佛解脫。當於眾生心行中求也。故大智論
云。佛爲學問人。從聞求解。以樹爲喻。爲坐禪人。從心

求道指身爲喻。若因樹生解。是信行人。從身得悟。是法行人。大智度論評云。有慧無多聞。是不知實相。譬如大闇中。有目無所見。此人專修觀解。不尋經論。又云。有多聞無智慧。亦不知實相。譬如大明中。有鐙而無照。此人止尋經論。不修觀解。又云。多聞立智慧。是所說應受。此人外通經論。內觀分明也。又云。無聞無智慧。是明人身牛。夫聖人說法。深鑒機緣。一音所演。隨根曉悟。若無道眼。豈可徧執一端。故說法門。必須雙舉。庶幾學者。了其明闇。問曰。觀心五義。與經五義。爲一爲異。荅曰。不卽不異。問曰。云何名爲不卽不異。

答曰。卽理雖同。異義有六。一者理卽。二名字卽。三觀行卽。四相似卽。五分證真實卽。六究竟卽也。一理卽者。此經云。姪怒癡性。卽是解脫。此是理卽義也。二名字卽者。如大涅槃云。外人舊醫。虛妄計涅槃常樂我淨。如蟲食木。偶得成字。是蟲不知是字非字。有智之人。終不說言。是蟲解字。今末世學問坐禪之人。聞此大乘方等經。說姪怒癡性。卽是解脫。卽大涅槃。不可復滅。不究深義。執此卽名。謂真解脫。是則同彼舊醫蟲道之過。此是名字卽也。三觀行卽者。行人精通三觀。善識二諦。三諦四諦。開合不亂。信解分明。能知此

心卽是解脫。願行善巧。入五品第子。伏忍之位。此是觀行卽也。四相似卽者。如鐵輪十信。雖是肉眼。名爲佛眼。法華經說。六根清淨之相是也。此卽柔順忍位。名相似卽也。五分證眞實卽者。從初發心得無生忍。至金剛頂四十一地。皆名分證。所以者何。如華嚴經云。初發心時。便成正覺。了達諸法眞實之性。所有慧身。不由他悟。此是分證眞實卽也。乃至十地等覺。皆是分證。但有深淺之殊。故有諸地階級也。六究竟卽者。卽是妙覺。一念相應。盡不思議實相之境。故法華經云。唯佛與佛。乃能究竟諸法實相。又仁王經云。三

賢十聖忍中行。唯佛一人能盡源。盡源者。是究竟卽也。此六卽者。在理非殊。約其行解。天人懸絕。豈得聞卽。便爲一槩。世間學問坐禪之人。若不善解六卽之殊。多生叨濫。未解謂解。未得謂得。墮增上慢。起諸過罪。此豈學佛法得意者乎。今舉一。可以例諸一切大乘深經。或云眾生卽是佛。卽是大乘。卽是菩提。卽是涅槃。如是等明卽。是悉須用六卽義約一切。皆不叨濫也。第六對四悉檀者。復爲二意。一以四悉檀對前五義。二略釋四悉檀起觀教之相。一對五義者。卽爲五。一對經名者。名卽維摩羅詰。維摩羅詰卽是世界

悉檀也。二對體者。體卽眞性解脫。眞性解脫卽是第
一義悉檀也。三對宗者。宗是佛國因果。勸修種種淨
土之行。卽爲人悉檀也。四對用者。彈訶折伏。此卽對
治悉檀也。五總對教相者。以四悉檀起諸經教。與此
經教有同有異。卽是判教相。知同異也。二明略用四
悉檀起觀教者。夫心源妙絕。萬法幽玄。諸佛菩薩。若
不用悉檀。豈能修三觀而進道。演說教門。而度一切
四悉檀起觀教。以通此經。略爲七意。第一翻釋。第二
辨相。第三釋成。第四起三觀。第五起四教。第六起經
論。第七起此經教。第一翻釋者。悉檀是外國之語。諸

師解釋不同。或言有翻。或言無翻。言無翻者。外國有多含之言。此土無有多含之語。以翻悉檀。例如修多羅。名含五義。此土不的翻也。言有翻者。或翻宗成。或翻爲墨。或翻爲印。或翻爲實。或翻爲成就。究竟如是。異翻非一。難可定存。南岳禪師云。此例如大涅槃是胡漢兼攝也。今言悉檀者。悉是隋音。檀是胡語。悉之言徧。檀翻言施。佛以此四法徧施眾生。故言悉檀也。第二辨悉檀相者。一世界悉檀。二各各爲人悉檀。三對治悉檀。四第一義悉檀。大聖爲破外人。邪四悉檀。故說此四種正四悉檀。說一切大小乘經教也。一世

界悉檀者。卽是眾生五陰十二入十八界一切諸法。名相隔別不同。故名世界。外人迷此世界。或計無因緣有世界。或計邪因緣有世界。大聖隨眾生所欲樂聞。爲說正因緣世界之法。令眾生得世間正見。卽是世間法施。故名世界悉檀也。二各各爲人悉檀者。大聖觀人心而爲說法。人心各各不同。故於一事。或聽不聽。如經所說。雜報業故。雜生世間。得雜觸雜受。更有破羣邪經說。無人得觸。無人得受。此意正爲破執生信。增長善根。施諸善法。故名各各爲人悉檀也。三對治悉檀者。大智論云。有法對治。則有實性。則無對。

治則有者。卽是貪欲多。教修不淨觀。瞋恚多。教修慈心觀。愚癡多。教觀因緣也。佛說對治之法藥。徧施眾生。爲斷其惡。故名對治悉檀也。四第一義悉檀者。大智論明第一義悉檀有二種。一約不可說相明第一義悉檀。二約可說相明第一義悉檀。一約不可說相明第一義悉檀者。卽是諸佛辟支佛羅漢所得真實法名第一義悉檀也。故大智論云。言論盡竟。心行亦訖。不生不滅。法如涅槃。說諸行處。名世界。說不行處。名第一義。二約可說相辨第一義悉檀相者。如大智論云。一切實。一切不實。一切亦實亦不實。一切非實。